

# Mud Volapüka

Nüm 70

18 gustul 2017

---

## Bukemaboed

Fövot lekoned-mära yutopik  
„Ventürs hiela ‚Nenolikan‘ e flenas omik“  
fa hiel „N. N. Nosov“

Kapit teldegid. Kölamarüd avobom.

Du Skrubül e Lebuonül ätävom pö Kaitöp, sukölo soldaferi, jens veütik äjenädons tö Grünazif. Del eprimon me utos, das Kölamarüd ifi**be**pänom pöträti Nifaflogüla. Ifegebom düpis ti tel pro atos, ab pöträt pe**ko**edon plöpön ad äsvo lifik. Süm kol rigädasaman äbinon voätiku. Do mödikans äsagons, das Nifaflogül logotof igo jönikummo pö pöträt ko pö lif, ab atos äbinon neveratodu. Nifaflogül leno änedof, das bepänan ädialom ofi. If Kölamarüd eplöpom ad dif**ül**ük**ön** jöni lienädas ofik e bepänön onis [lienädis] notodikummo e magädikummo, kludo ebo atos paflagon de lekan legik, kelu [lekanu legik] pänav binon.

Pöträt pe**lä**gon pö völ cema donik, dat vil**öl**ans valik okanons logedön oni. E vilölans mödik äkomons. Valikans, efi**da**logöls pöträti, ävilons, dat Kölamarüd koo ubepänom onis, ab Nifaflogül äleadof nüdranön neki ini cem löpik, bi Kölamarüd ün tim at äbepänom pöträti Blövalogikana e publüg plödik äkanonöv tupön omi.

Nenolikan, kel äzigolom love cem löpik ed äkonsälom Kölamarüdi konsälis nenfrutik ad jonön, das sevom mödikosi kol pänav, elelilom jovi tonöl donao.



„Kikodo lenoid dabinon is? Dub kod kinik lenoid dabinon?“ - ävokädom, doniogolölo ve tridem. - „Mogolorsöd lü doms olsik!“

Jicilils, elilölo vödis so=nesofik, igo no äbadocedofs, bi tuvemo ävilofs pa=getedön fa pānan. Gūo ezüofs Nenolikani pö flans valik, ed eprimofs nemön omi as ‚Nenolikan=ül löfik‘ e begön ad no momofön ofis.

„Ekö, fomorsöd poodkedi!“ - Nenolikan ävokädom, sleifölo jicililis e dränölo ofis äl völ. - „Stanorsöd ad poodked, voto umomofob valikanis!“

„Kio grobäliku binor, o Nenolikan!“ - Nifaflogül evokädof. - „Vo-li mögos ad dunön somiko? Igo jemob demü or.“

„Lindifos“ - Nenolikan egesagom.

Ettimo jicilil nog bal enürönof ini cem ed, efrutidölo bruli kobädik, edränof stedöfiko lü tridem äl löpio. Eküpölo atosi, Nenolikan epo=judedom lü etan ed igo äprimikom ad gleipön ofi len brad, ab estopikof ed, elülogölo pleidiko lü om, ekled=ük=of fümälo doati okik lä nud omik:

„He!, takedö! Dalob bugolön - binob ji=poedanu!“

Elilölo taspiki so süpik, Nenolikan elestunom [emaifükom mudi demü lestun], ab jipoedan, frutidölo kofudi omik, eflekof bäki oki lü om [edeflekof oki de om] e no spidölo ägolof lü tridem.

„Lio esagof? Kifu binof?“ - Nenolikan esäkom, bluviko lüjonölo äl tridem me doat.

„Jipoedan. Lautof poedotis [poedof].“ - jicilils eplänofs.

„Pösod no cädik.“ - Nenolikan esagom. - „Koo labobs poedani: tidäb obik. Seimna äbetidob omi ad poedön, nu it kanob poedön.“

„Ag, kio nitediko! Kludo, koo äpoedor-li?“

„Si, äpoedob.“

„Ag, kio=skiliku binor! Äbinor e pānanu e poedanu...“

„E musiganu.“ - Nenolikan eläükom lucädölo.

„Resitörös poedoti orik seimik.“

„Poso, latikumo.“ - Nenolikan egesagom, lüjinölo, das no labom timi.

„Ab poedan orik lio panemon?“

„Panemon as ‚Florulan‘.“

„Ag, kio nitediko!“ - jicilils äplodofs. - „Hipoedan orik panemon as ‚Florulan‘, ab jipoedan obsik panemon as ‚Vielaflorulan‘. Vo-li, sümos-li?“

„Bosilo sümos.“ - Nenolikan esiom.

„Nem at pliton-li ori?“

„Bosilo.“

„Ab poedotis kinik poedof!“ - jicilils äsagofs. - „Ag, poedots kio dafredüköl! Ekö, tevorös löpio, bo etan oresitof poedotis ofik. Nitediko, oplidor-li onis!“

„Benö!, mögos ad tevön.“ - Nenolikan esiom.

Kü atan enüxänom ini cem löpik, Kölamarüd ya äfiduinom pöträti Blövalogikana, ab Vielaflorulan äseadof su söf lä Lür ed äspikotof ko om dö musig. Deflekölo namis ad pödü bäk, Nenolikan äzigolom pö cem, älogedölo badiniludiko me logeds vifilik äl jipoedan.

„Kikodo ai zigolor is äsvo pendül?“ - Vielaflorulan esagof Nenolikane. - „Begö, seidorös oki, bi logs dadolons demü mufed orik.“

„No guvorös is.“ - Nenolikan egesagom nesofiko. - „Voto ubüdob Kölamarüde ad no bepänön pöträti orik!“

„Ö! Vo-li kanom büdön ore?“ -

Vielaflorulan eflekof oki lü Kölamarüd.

„Kanom. Kanom valikosi.“ - Kölamarüd egesagom, kel ziliko ävobom me köf ed igo no älilom utosi, kelosi Nenolikan esagom.

„Lesi kanob.“ - Nenolikan efümükom. - „Valikans mutons lobedön obi, bi binob cifu.“

Elelilölo, das Nenolikan labom nämädi so vemik bevü hicilils, Vielaflorulan esludof ad koedön sofälikön omi:

„Plidö, sagorös: vo-li idatikor bäluni?“

„Lesi!“



„Upoedob poedotis dö or seimna.“

„Atos lindifon kol ob!“ - Nenolikan emurom.

„Liedö!“ - Vielaflorülan esagof. - „Ga no ällil or poedotis, kelis poedob.

Vilor-li, das uresitob poedoti seimik pro or?“

„Benö, resitorös.“ - Nenolikan eyilidom benädiko.

„Uresitob poedoti brefabüiko pe=poedöl fa ob dö muskit pro or. Lelilorös:

,Edafanob muskiti. Nö, udafanob-la

Ta-ra, ta-ra, ta-ra-ra! Gudikumo furmid=üli.

Löfob muskit=üli, furmidül koo lügodon,

Tru-lü-lüli, tru-lü-lü! Koo löfilon ad spatön...

Ab muskitül elügikon. Saidos ad jäfön tefü on.

Pidob muskitüli. Nedos ad reidön buki.“

„Brafö! brafö!“ - Kölamarüd evokädom ed igo äplodom.

„Poedot vemo gudik.“ - Lür elobom. - „Noe muskit pa=mänioton pö on, abi dö utos, das nedos reidön buki. Atos binon poedotu frutik.“

„Täno lilorsös uti nog bal“ - jipoedan esagof ed eresitof poedoti, pö kel ya libelul pla muskit pamänioton e kel finikon me vöds: ‚nedos ad nägedön kloti‘ < pla: ‚nedos ad reidön buki‘.

Poso poedot dö musak=ül päresiton kel finikon me vöds: ‚nedos ad lavön namis‘. Fino poedot peresiton dö utos, das ‚nedos ad svipön glunüli‘.

Ettimo Kölamarüd elölöfükom pöträti Blövalogikana. Valikans ekobikons züo e leigüpo eprimons ad notodön stunidi oksik:

„Magifö! Süperö! Sublimö!“

„O plitülikan, kanor-li i bepänön obi lenlabü klot blövik?“ - Vielaflorülan elüikof lü Kölamarüd.

„Lio pö ut blövik if lenlabor grüniki?“ - Kölamarüd esäkom bluvüli.

„Ga atos lindifon kol or, o plitülikan. Klot obik binon grüniku, ab bepänorös blövik. Ülenükoböv kloti blövik if äsevoböv, das Blövalogikan lenlabü ut blövik ölogotof so jöniko pö pöträt.“

„Rajanö.“ - Kölamarüd eyilidom.

„Begö, i bepänorös logis obik klilablövik.“

„Ab ga labor logis dofabraunik.“ - Kölamarüd eprotestom.

„Plidö, o plitülikan! If kanor bepänön kloti blövik pla grünik, täno kikodo no mögos ad bepänön logis klilablövik pla dofabrauniks?“

„Dif dabinon pö jenet at.“ - Kölamarüd egesagom. - „If viloröv, täno kanor lenükön kloti blövik, ab kanor plaädön logis orik ad klilablöviks me mod nonik.“

„Benö! Täno, plidö, bepänorös logis dofabraunik, ab uvotükorös onis ad gretikum.“

„Ga ya labor logis gretik.“

„Plidö, bosilo! Vilob, das uts obinon gudikumu. I bepänorös logaheris lunikumu.“

„Benö.“

„I bepänorös heris goldöfik. Ga labob heris ti goldöfik!“ - Vielaförulan ädabegof.

„Atos mögon.“ - Kölamarüd eyilidom.

Eprimom ad bepänön jipoedani, ab etan ai älöjutof, älüjutedof lü pöträt ed ävokädof:

„Bepänorös logis bosilo gretikumu! Plu, plu, plu! Ulunükorös logaheris! Smalükorös mudi bosilo... Nog, nog!

Fijenos, das logs pö pöträt esekons le gretikumu, kels no dabinons pö jenöf, mudil esekon smaliku ko gretot mö peäna-löp, hers esekons äsvo binü gold natidik, valemo pöträt ti no äsümedon ko Blövalogikan. Ab jipoedan vemo äplidof oni, ed äsagof, das no vilof pöträti votik.

*Reidolsös fövoti konota pö nüm fovik.*

